

Somlavila e la Cort dal Re

Al è da un pousj di agns che da fonts da mê anima, cîr di scjafoiâ un pinsîr, se cualchi volta mi svei via pa not e a mi ven pal cjâf, no mi lassa plui cjapâ sum. Al è chel da cort dal Re, di cemût che al è cambiât dut in Somlavila.

Un centenâr di viaçs a mi à contât don Tarcisio cemût che a è comenciada la sô storia, parcè di chest non, cemût che si è slargjât plan plan, in un viers e in chel ati, dant origjine as fameas partint dai grops.

Vin notizias documentadas za dal 1200 dai prins insediaments tal nosti paîs, che al partisj dal çoc di dôs fameas: i Puntel e i Micolino.

Sicuramentri ator da placia dulà che a era l'aga, aventi da fontana. A sinistra, a sji son slargjâts i Puntel, a diestra i Micolino.

Dal 1630 e dal 1649, in ta famea di Cristof-Micolino (+1630) a son rivâts in cuc Zuan Primus da Temau e il Maieron da Scluse, dant vita a chei doi cognoms. I Maierons cun las cjasadas a sji son massedâts cui Micolino, che dopo a sji son svilupâts encje tor da Gleisia.

I Primus, inveza, a sji son slargjâts su la fassia sora da Lateria (Ian – Titin).

I Puntel ju pal Borc e dopo di sora fint da cjasa di agna Menia e Cirillo e su fint di Chinop, la cjasa plui alta di Soratet.

Chesta di Soratet a è la cjasa plui vecja di Cleulas, nominada tai documents (Leonardo de Soratetto di Cleulis, fin '500). Da chesta cjasa ai salta fûr chei dal Tuc (ch'ai son in ora di vuei) e po i Ros e i Toniz che ai son lats in cuc da pît dal paîs (aî di Poldo) e chei aitis si son slargjâts in Somlavila (Gjiubil, Re, di Pauli, Soratet, Prancjul, Peta, Miedi (aî di Cinto) e i Sjatis (in Frinz).

Las cjases di Postet no esistevin: doma la cjasa di Jan (Rina) che a era Primus. Viers dal 1660, un Prodorutti vignût in cuc da Damâr a sji è stabilît aventi di Renzo.

Via pal secul (XIX) las fameas plenas di fiolança a àn començât a slargjiâsi in lunc e in larc, fassint cjasas encje fûr dai stâi, tai orts, par stâ il plui pussibil tal grop. Parfint par sparagnâ las fasjevin cussì tacadas, l'una su che ata in mût da vei i mûrs in comunion, cuasi a incjastri. Cussì al è saltât fûr Postet. Dopo las fameas e i grops massedâts a àn fat si che a la fin sin come una sola granda famea, ducj in parentât.

Una peraula sul soranon “Re”.

Il Re (Svualt Puntel 1842 - 1915) al era fî di Jacum Gjubil (1792 – 1851) e Filizita Canciani di Prât (1795-1874) in famea ai an dât chest soranom parcè che al era il plui piçul di 11 fradis, nassût cuant che il pari al veva 50 agns e la mari 47. Il fradi plui grant Zuan che al à fata su la cjasa tas Pilas al veva 20 agns e la sôr Luzia 24(1818-1851). Al è nassût proprit cuant che ormai ai crodeva di vei sierât cantîr, ma lo stes al è stât acolt come un re; e lui al à continuât la stirpe ta chesta cort, fint ai fîs di gno nono Zuan. Ormai però a è distudada, che ta cort dal Re no nd è plui gjenia. Vin doma il confuart che i siei fîs lâts in Brasîl (Jacum, Pauli, Narda e Catin) a àn puartât lavia la semence dulà che in ora di vuei si podin contâ centeârs di oriundus.

Tantas fameas! Implantada duncja la cjasa vecja dal re, ta chesta cort, prima di una banda e dopo di chê ata i fîs a l'an slargjada, ma no nd'era puest par ducj parcè che las

fameas as erin numerosas, encja se a vevin la cultura di stâ unîts e no sbarniçâsi, cualchidun al à scuignût lâ di una ata banda e implantâ la sô scjela.

Sicuramenti doma sot il gno ricuart and'era vita, int e tanta canaia. Comenciant insom, cun la Tunina, mari di Gjildo, che cun la Lice a àn vût 5 fîs; la Uliva mari di Gjent e la Liva aitis 5; la Nena da Preolana, fint che no son lâts a stâ in Leipà, cun la fia Marta e Lino e i fîs; Ana di Chinop cul fî Tita Jacum e la Pasqualina; Teresina e Teu e dongja un fî cun la brût e doi fîs; Nart e Delfina cul fî Marcello e Maria 4 fias dongja; Ennio e Ines, 5 fîs; chei dal Nac, Nart e Mariuta prima di lâ in Francia (5 fîs, dopo un nassût a là); dopo di lôr Emma e Cinto, cun i lôr trei fîs e il Pieri; cumò Tita e Miranda e un fî; ta cort dal Re, nona Tinga, la cjasa di barba Zef vueita che a erin emigrâts in Tunisie; Sisto e Maria cun trei fias e sora agna Luzia (Steca) cun la gnet Tuta e Tevut cun i trei fîs, un dai cuâi don Tarcisio nassût propit aî, dopo par un pouc son lâts a stâ ta cjasa di Grivôr che al era in America, intant che, una volta comprada, a regolavin la cjasa di Leipà e dopo la àn screada cun atas dôs fias; dopo di lôr a stavin Fanio e Maria cui lôr 6 fîs, fint dal 1966, cuant che a son vignûts ta cjasa di Severin; la cjasa da Mina cun agna Tunina (don-don), chê dai Gjiubi, Sjulín (la Frutina) e il fî Pauli e Loisa, doi fîs;

Dopo chê dal Tuc, cun von Pieri, Emma e nevout, fint che a no è lada a marîl dal Nac; la Cia e Pauli, trei fîs; la cjasa di Chinp cun agna Vigja e dongja Forapipas e la Giusepa, trei fîs; plui in su Teu e la Dumina cul fî Berto e la Gjova (trei frutas fint che no son ladas in Leipà, ta cjasa nova).

Cumò dut cambiât. Chest al è il borc dulà che las mê s radîs a àn supât la vita. Cumò al è tant cambiât che a sji stenta a riconossilu.

Di Gjildo ogni tant al ven Carmelino a dâ vita; di Gjent, l'Olivo al è tornât cun tant entusiasmo. Paolo, Antonella e la fia Vania a sji son definitivamentri stabilîts in Somlavila; aî di Ana a son forescj che ai tegnín cont e di tant in tant nus fassin compagnia; ta cort "da Preolana", Toni e Maria simpri indafarats a sji fassin buina compagnia. Da pouc, purtrop, Marcello e la Ines nus àn lassât, finint di disvueidâ Somlavila, lassiant doma il Romel bessol. Di Gjubil, la Loisa cul fradi Bepo e il Danilo simpri presint; dal Tuc, finalmentri une bocjade di osigjeno cun la Daria e il Dino e il piçul Alberto; da Cia e di Chinop, par cumò nissun ati; aî da Dumina, forescj che si ju jout ogni muart di Papa.

Ai lassât par ultim la mê cort dal Re, che cumò a è la mê spina, a jodila cussì bandonada e vueita, plena di ricuarts sbiadîts, ormai di pousj, che a met tanta malinconia.

Duncja dal 1964, gno pari al lavorava a Brunic come tancj paesans, jo e mê sùr ormai grandes sin maridadas, la piçula a finiva las scuelas; gno pari al à pensât ben di fâ lâ a Brunic encje mê mari e mê sùr dulà che a vares vût plui pussibilitâts di cjatâ lavôr e di chê strada riunî la famea che a restava. La cjasa da Tinga vueita, come che di Zef che vin det, chê da Mina ormai un cjasai, come il stali dongja da cjase di Gjubil, che al era colâ denti a causa da granda neveada dal 1951. Dal 1966, i miei a sji son stabilîts definitivamentri a Brunic.

Dopo la sdrondenada dal Taramot dal 1976, al era necessari meti man a cjasa. Barba Fanio tal 1971, al è di colp mancjât, lassjant i siei 6 fruts di colp uarfins, cussì agna

Maria, nus à proponût a nou di comprâ la part di Barba Fanio cul cjason da Mina, che par fâ placia vin scuignût puartâ fûr dut il matereâl.

Al inizi dal 1978, si comença a rinfuarçâ e rifâ il tet, gno pari, dopo un grâf problema di salût che progressivamentri al va pegjorant, tal Otanta nus lassa e cussì da chel moment al resta dut in sospeis. Il gno om al pensa che un pouc a la volta, cuant che al sares lât in pension, la vores finida di sistemâ, ma dal 1992, dopo una colada tant che al stava regolant il stali, nol pos plui impegnâsi in lavôrs di fadia.

Il gno sum di tornâ a passâ la vecjaia in Somlavila, pasintmi lassù parsora i tets e cjalantmi ator fint dulà che al sji piert il vouli, al si è frantumât. Mieî fîs a son impegnâts in atas bandas e no an i mieçs par imbarcâsi in chesta aventura.

Dal 2004, una ordinancia nus impon di tira ju la cjasa di Zef; la nosta vecja tal mieç, a part di chê da Tinga. Al era un riscjo che cualchi clap colant al podes jessi un pericol.

Cussì cumò la cort dal Re a è totalmentri cambiada, in ogni sens mi samea che a seti colada ju par me chê maledizion che a diseve: “Che a cji cressin las jerbatas ta cort”. No nd è plui vita a part la Loisa, no plui fruts in Somlavila, doma l'Alberto. Tant silenzio, tant abandono, tanta tristece. E la mê cjasa pieis di dutas: comenciada e mai plui finida; al è plui lusôr, il soreli dut il dì, sji viout via parfint la Creta cumò, ma par cui?

Cui poda avei tanta passion e i mieçs par salvâ la part di storia che a à rapresentât la cort dal Re? Encja da chi fameas interias a son partidas par lâ a cirî fortuna in Brasîl... A contava Paulina, la femina di Toni (dopo trasferîts encja lôr a Castelfranco) che la Marianna prima di partî ai veva lassiât una cjicara dulà che a bevevin insiema il caffè di vuardi fat tal cjalderin a ricuart da lôr amicizia e a sji la veva puartada daûr.

Cumò a torna cualchi discendent, par jodi dulà che a son partidas las lôr radîs, cuissà ce pena, ce delusion a jodi dut abandonât. A mi dûl il cûr a viodi ducj chei sacrificis che a àn fat i miei vons, duta la miseria patida, dutas las fadias e chei che a son lâts lontans, cetanta peta. No son doma i mûrs, i claps, ma pensi a chê granda schiria di int passada, ognidun al à dât il so contribût da so vita tribolada a chesta storia e jo no pos, no ai savût dâ il gno par che a podi continuâ. Par chest cuant che passi à su, cul grop volti il cjâf di chê ata banda, glotint las agrimas. Soredut pensant a gno pari che al era cussì orgogliôs da sô cjasa, da sô storia, da sô cort.